

Ангела вам сожилца Димитриа встретаите,
 Любезна сожителя любо приветстуйте
 И песнь величания тому уготуйте.
 Небо, иже во страстех того потемнися,
 Того ныне приемши, пресветло явися.

л. 30 об.

А н г е л 1-й

Боже, создателю наш, будь благословенный,
 Яко Димитрий ликом нашим приобщенный.
 Радуйся, Димитрие, за Христа страдавый,
 Во уды и на копия ты за того давый,
 Приемлем мученика радостно, любезно,
 Витаи в наших жилищах во веки бесслезно.

А н г е л 2-й

Возрадуйтеся днесь вси ангельскии лики,
 Зане преселяются ко нам человеки.
 Се ныне Димитрия в небеса приемлем,
 Сожителя нашего любезно объемлем.
 Все мы лики нашими любезно встречаем,
 Все убо того песньми днесь да величаем.

П е н и е

Величаем тя страсотерпче Христов, Димитрие, и чтем честная страдания твоя, яже за Христа претерпел еси.

Е п и л о г

Венец его же прежде сплетать навыкохом,
 Святому Димитрию по силе сплетохом,
 Аще от скудна ума и не цветословен,
 Святому и слышащим да будет любовен,
 Вем яко лучши в небе ангели сплетают,
 Егда все едногласно того величают.
 Мы же елико мощно, егда соплетахом,
 Вместо шипков, все сердца наша прилагахом,
 Теми ж сердца желаем, в чом где погрешили,
 Дабы нас сердца ваша в сем действе простили.
 Наипаче, о владыко, от твоей святыни
 Молим, да простиши нас своей благостыни,
 Вем бо, яко лучши венцы соплетаеш,
 Жития святых пишуш, всех святых венчаеш.
 За то венец дадеса ти златокованны,
 Архиерейский, им же еси увенчанны
 Будешь потом увенчан венцем вечно властным,
 Якоже и твой ангел дванатцаточастным
 Трость пишуща, то копье, а пот стоит крове,
 Яже от пресвященна чела ти исплове.
 Часть дванадесятую венца ти сплетаеш,
 Егда дванадесятый месяц совершаеш,
 Будеши венцем неба за то увенчанный,
 Святых возвеличивый, будеш величанный
 Его же ти по долгой зде жизни желаем,
 Смирно твои питомцы главы преклоняем.

л. 31

А м и н ь .